

են. նրանք մինչեւ անգամ խառն են լինում յարեմական գաղտնիքների մեջ, եւ խաթունների հաւատարիմ խորհրդապահներն են դառնում: Փաշաների գանձապետները հայեր են, եւ նրանց կաշառակերութեան խիստ վարպետ հայթայթողներն են լինում: Թողնենք մասնաւորը, անցնենք ընդհանուրին. մի գիւղ, որ բնակեցրած է ամբողջապէս հայերով, ակեյի բարձր գին ունի, քան թէ նոյն տարածութեամբ եւ նոյն բազմամարդութեամբ մի ուրիշ գիւղ, որ մահմեդականներով էր բնակեցրած: Ինչո՞ւ: Որովհետեւ հայը հլու եւ արդիւնաւոր հպատակ է: Նա հլու է, երբ տերն օտարազգի է, բայց ես գիտեմ գիւղացիներ, որ վատ են վարւում իրանց տիրոջ հետ, որովհետեւ նա հայ էր: Դա ինչի՞ց է:

Ասլանը, որ բոլոր ժամանակը ուշադրութեամբ լսում էր, պատասխանեց.

– Պատճառը շատ պարզ է: Մեր ներկան, դուք ինքներդ ասացիք, որ մեր անցեալի շարունակութիւնն է: Այդ տխուր երեւոյթների պատճառները պէտք է որոնենք մեր տխուր պատմութեան մեջ...

Համարեա առաւօտեան լուսաբացի մօտ էր, երբ մենք դուրս եկանք տեր հօր տնից եւ գնացինք մեր բնակարանը, վարպետ Փանոսի տունը: Դուրս գալու միջոցին Ասլանը խորին շնորհակալութեամբ բռնեց տիկնոջ ձեռքը եւ ասաց.

- Մենք, յոյս ունեմ, դարձեալ կը տեսնենք:
- Անպատճառ, – ասաց տիկինը:
- Որտե՞ղ:
- Ես կը գամ քեզ մօտ:
- Դա անյարմար չէ՞ր լինի:
- Ամենեւին:

ԺԷ. ՊԱՆԴՈՒԻՆՏ ՎԱՆԵՑԻՆ

Օրը շաբաթ էր, այն սպասած օրը, որի գիշերը ես ու Ասլանը հրակիրօճ էինք սրբազան առաջնորդի մօտ: Ասլանը զբաղողած էր ինչ-որ պատրաստութիւններով, իսկ ես, անգործութիւնիցս ձանձրացած, չգիտէի ինչ անել: Առաջնորդի հրաւերքը ինձ խիստ հրապուրում էր, բայց մինչեւ երեկոյ սպասե՞լ, այդ շատ եւ շատ ծանր էր ինձ համար: Դուրս եկայ փողոցը, նստեցի մի հաստաբուն ուռենիի հովանու ներքոյ, հոսող առոակի ափի մօտ: Այդ ուռիները ամառնային տօթերի ժամանակ խիստ զով պատսպարան են բնակիչ-